

光緒重修安徽通志

重修安徽通志卷二百二

人物志

忠節一

夫忠節尚已歷稽往籍代有完人不以皖南北風氣之剛柔爲異亦不因祿位之大小有無而殊我

朝

列聖相承勸忠典懋其有授命勤事者

旌卹從優卽勝朝殉難諸臣猶蒙

賜諡褒嘉以示公義而維綱常是以薄海臣民感激奮發捐糜頂踵水

火身家甘之如飴而無所於悔川楚陝蕩平而後如海疆之役

髮捻苗回諸匪之變報

國者指不勝屈矣故今所修輯人數較多於舊志然猶第取其從

軍帶團身在行間親冒矢石與夫閭門捐生者耳邂逅殉難諸人別具忠義表述人物志忠節

安慶府

吳陳武字子烈廬江松滋人年十八謁孫策於壽春因從渡江拜別部司馬策破劉勳多得廬江人料其精銳以武爲督所向無前及權統事轉督五校仁厚多施鄉里遺方客多依託之尤爲權所親愛進位偏將軍建安二十年從擊合肥奮命戰死權哀之自臨其葬

三國志本傳

宋傅高太湖人景炎中張德興起義兵高率眾應之爲元所破被執不屈死之

一統志

劉源字叔清淮西野人原義兵長也

野人原潛山地

性慷慨負大節咸

淳中聯絡山寨保障鄉里德祐元年范文虎以安慶降元景炎

二年源與淮人張德興殺太湖縣丞據司空山傅高舉兵應之
源建寨野人原相犄角復黃州壽昌軍與元宣尉使鄭鼎戰樊
口鼎敗墜水死八月元兵攻源寨不克遂移兵襲司空山張德
興傅高皆死黃州復陷源不勝憤力戰而死自景炎至祥興守
禦凡三年

一統志

元葛昂字銘德潛山人元季兵起募義兵保障鄉里駐皖山累
立戰功事聞授安慶萬戶府金符千戶後天完兵攻安慶府城
陷死之

江南通志

陳道夫懷甯人余闕守安慶辟道夫爲懷甯尹撫綏有方陳友
諒攻安慶闕欲自殺道夫曰忠臣當死於敵今力尙未窮宜死
守幸一戰而勝可保全江淮矣闕從其言遂屢卻強敵城陷與

闕同死之

一統志

按元史類編載與闕同死者有陳巨濟桐城人其事與道夫相類不知是一人否也

章祥桐城人從余闕守皖爲義勇都司城陷赴敵死同邑胡顯祖應募爲義兵帥從闕戰城下屢有功闕旣殉難顯祖與其族中五彌盛天壽友忠並死之

桐城縣志

明王勝桐城人善讀書尤好兵法元末歸明太祖累功官左元帥攻陳友諒取江州賜金帶良馬鄱陽之戰謀火攻勝應募詐降夜縱火焚其營乘火奮擊大破之勝力戰死時至元二十三年七月辛卯也贈太原郡侯肖像康郎山忠臣廟

明史趙德勝江南通志

甘霖懷甯人洪武丁卯舉人建文時官御史剛介敢言靖難兵起被執不屈從容就戮子孫相戒不復仕

明史王度傳

國朝乾隆四十一年

賜諡節愍

勝朝殉節諸臣錄

方法字伯通桐城人洪武己卯鄉薦官四川都司斷事成祖登極諸司表賀當署名不肯投筆出被逮舟次望江瞻拜鄉里曰得望我先人廬舍足矣自沈於江

明史方孝孺傳

國朝乾隆四十一年

賜祀忠義祠

勝朝殉節諸臣錄

柳升懷甯人襲父職爲燕山護衛累功遷左軍都督僉事永樂初從張輔征交趾還封安遠伯七年從陳瑄帥舟師巡海大破倭追至金州白山島明年從北征大破阿魯台進封侯帝凡五出塞升皆有功宣德元年命充總兵官征黎利連破之升易賊而不設備追至倒馬坡馳渡橋橋壞後隊不得上賊伏四起陷

泥淖中中錄死子鴻襲正統十二年贈升融國公諡襄敏

明史本傳

江永望江人襲杭州前衛指揮僉事正統十三年隨軍征剿衢

州府盜賊至江山縣奮勇陷陣亡贈指揮同知

浙江通志新增

俞鑑字元吉桐城人以進士授職方主事英宗北征郎中胡甯

當從以病求代鑑慷慨許諾或曰家遠子幼奈何鑑曰為國臣

子敢計身耶尚書鄭瑩知其賢數與計事鑑曰惟力勸班師耳

竟死土木之難

明史王佐傳

周璽字天章太湖人

成化廬州

宏治丙辰進士授吏科給事中三遷

禮科都給事中武宗初即位請毀新立寺觀停止醮事正德元

年應詔陳八事帝雖不加譴不能用也明年擢順天府丞璽論

諫深切率與中官牴牾劉瑾等積不能堪會命璽與錦衣都指

揮楊玉勘近縣皇莊玉本瑾黨同官皆下之璽辭色無假公移

與王止牒文王奏璽侮慢敕使瑾卽矯旨逮下詔獄考掠死瑾

誅詔復官賜祭恤其家

明史本傳按璽祠墓並入廣州

汪鑾懷甯人正德己卯宸濠叛攻城北鑾遇賊被執脅令諭城中出降且誘以官鑾至城下大呼曰王師已破南昌可堅守賊怒解其屍眾犬爭欲噉之一犬守護甚力見者知係鑾犬因知爲鑾屍也有司狀聞詔旌其門

一統志

張澤字大被桐城人嘉靖中由選貢歷沅江巫山知縣遷衢州通判廣安知州皆盛著政績吏部察其廉能書名於壁以治行卓異超擢雲南僉事武定土酋鳳繼祖叛圍武定新城督兵馳救被執使作書乞撫澤叱之尋見殺事聞贈光祿少卿賜廟額

忠節

一統志 明史雲南土司傳

黃孟五潛山人以義勇從討倭賊屢立戰功授千戶賊懼其勇

併力擒之豹之降不屈賊支解之

安慶府志

張維忠太湖人少負技勇萬曆十七年賊劉汝國倡亂焚掠蘄黃太宿間維忠集義勇助官兵往剿賊敗維忠亦戰死邑人立祠祀之是時同死者宣縣丞及張鎮吉夢麟等凡五人皆祀於

廟

安慶府志

王來聘懷甯人

明史作京師人

崇禎四年中武會試視文榜例傳臚錫

宴定一甲三人來聘居首卽授副總兵武榜有狀元自來聘始

來聘既拜命感激流涕誓報國恩明年孔有德據登州叛官軍

攻之不下又明年二月以火藥轟城來聘先登中傷而死事聞

贈廕有加

明史姜名武傳懷甯縣志

國朝乾隆四十一年

賜諡烈愍

勝朝殉節諸臣錄

張秉文字含之桐城人祖潛自有傳秉文成萬曆庚戌進士歷
福建右參政與平海寇李魁奇進山東左布政崇禎十一年冬
大兵自畿輔南下巡撫顏繼祖奉本兵楊嗣昌檄移師德州濟南
空虛止鄉兵數百秉文等分門死守晝夜不解甲援兵竟無至
者明年正月二日城潰秉文巷戰被箭死之妻方妾陳並投大
明湖死贈太常卿

明史本傳

國朝乾隆四十一年

賜諡忠節

勝朝列節諸臣錄

阮之鈿字寶甫桐城諸生以劉若宰薦授穀城知縣未至賊張
獻忠已據其城求撫總理熊文燦許其屯牧居民洶洶之鈿至
盡心調劑民稍安之鈿上疏言獻忠虎踞其謀叵測臣愚妄謂
撫剿二策可合言不可分言時不能用又密啟文燦請設備不

答獻忠屯穀經年反形漸露之鈿憂憤成病題數語於壁自誓以死獻忠反遣使索印之鈿大罵遂死之後贈尙寶少卿明史本傳

賜諡忠節勝朝殉節諸臣錄

孟振邦字維新安慶衛世職乞休歸養中丞史可法強之出使視衛篆擢參將左兵陷城遂死之月餘始得屍顏色如生江南通志

賜諡節愍勝朝殉節諸臣錄

夏統春字元夫桐城人以諸生保舉授黃陂丞嘗攝縣事著廉能聲崇禎十五年賊犯黃陂統春已擢麻陽知縣未赴乃督眾拒守凡十五晝夜賊僞解去越五日突至陷城統春巷戰被執欲屈之指賊大罵賊怒斷其手猶罵割其舌目怒視乃剗其目

仍以頭觸賊遂支解之

明史本傳

國朝乾隆四十一年

賜諡烈愍

勝朝殉節諸臣錄

胡縝字瑟若桐城人由拔貢中崇禎己卯副榜官江西臨江府推官楊廷麟守贛州縝偕弟庠生繹守備納協力助守屢挫賊兵賊潛師來攻猝不及備被執縝呼曰吾殉國難二弟可自裁繹納並死之

桐城縣志

國朝乾隆四十一年

賜諡烈愍

勝朝殉節諸臣錄

舊志載胡縝桐城人官建昌通判從江西布政使夏萬亨守建昌城破被執至武昌不屈死注明史董盡倫傳按董傳之胡縝永甯人死奢崇明之難既非桐城亦未官江西疑必有

誤故改從縣志

孫臨字武功桐城人官監軍道副使監楊文驄軍兵敗被執不

屈死

明史楊文驄傳

國朝乾隆四十一年

賜諡節愍

勝朝殉節諸臣錄

唐鳳翥宿松人官仁壽知縣以慈得民崇禎十七年禦賊吮血

裹創力戰而死

四川通志

國朝乾隆四十一年

賜諡烈愍

勝朝殉節諸臣錄

王九鼎字在德潛山歲貢生知武強縣以不肯催科忤臺使挂冠歸尋補江西按察司知事移知儀封創築甌城流寇不敢犯改補故城縣城薄不可守寇至自燹其印死之先是九鼎以單

騎赴任親知無在左右者子基泰時泰叩閭上書奉旨查覆撫

臣黎玉田等稱其歷任屢著惠績一死凜烈千秋贈太僕少卿

蔭一子

一統志 明史孫士美傳 安慶府志

國朝乾隆四十一年

賜諡節愍

勝朝殉節諸臣錄

江襟楚字雲渚潛山人

或曰懷甯人

泰昌元年薦授興安知縣轉瓊

州府通判地苦蠻人爲患襟楚爲設備禦患遂止以疾歸崇禎

丁丑遇流賊被執不屈截舌而死

江南通志

國朝乾隆四十一年

賜諡節愍

勝朝殉節諸臣錄

陳學良字象頤望江人以明經爲祁門及嶺東韶郡教職歸里

後與弟學開隱居講道乙亥流賊徧鄉落除夕呼弟曰吾兄弟

重修安徽通志

卷二百二

人物志

忠節

七

安慶府

豈得常聚首乎因同守歲達旦猶行交拜禮次日賊入露刃挾

之學良厲罵遂遇害時年七十八

江南通志

王基培字爾因潛山人弱冠補諸生明末寇亂乃棄舉子業從事戎行入監軍楊卓然幕以功補太湖縣城守獻賊破城不屈

死之一門四十餘口俱遭屠戮

江南通志

胡士恂懷甯人性至孝學邃於易左兵陷城罵賊死妻張氏亦赴水死二子再寅紹虞俱悲憤不食死紹虞妻蔣亦自縊死時同邑庠生何雲方應旂陳尙炳及張應奎俱以罵賊死應奎年七十著有大衍圖邵子圖中圖解西銘說又布衣方都翰遇兵代父死蔣奕之阮之紆乙酉城潰救母死黃淡城潰母被刃與兄中通中德俱救母死

江南通志
安慶府志

吳普昭字克明桐城諸生崇禎丁丑流賊逼掠率鄉民團聚格

關十餘日被害妻孫氏痛哭死其子光璘光瑾殉之婦李氏許氏義不受辱皆死人謂一門五義云

江南通志

胡三友桐城諸生率鄉人團練殺賊踰年眾潰獨率子弟十數人前拒皆死之

桐城縣志新增

笪光宏字宏生桐城人端方有介節崇禎丁丑遇流賊不屈死之

江南通志

姚孫極桐城人崇禎丁丑流賊入境其父之章禦之死孫極年十六以身翼父遂死之

桐城縣志

左光燦桐城諸生崇禎丁丑遇賊被縛搜袖中得一簿知爲保障一方計厲聲叱之光燦罵曰殺卽殺耳鼠輩更何問哉賊怒拔舌斷足備極慘毒而死時同邑庠生左旗王夷吾趙之葵姚孫林陳力俱以罵賊死

江南通志安慶府志

王祥吳鼎和俱桐城人崇禎壬午死流寇之難

桐城縣志新増

周日耀號盤石桐城人外兄左光斗被逮日耀獨送之至京左死於獄仍扶其柩歸甲申五月聞京師破仰天大慟絕粒九日

嘔血卒

江南通志

汪之璞字石生潛山人流寇爲亂眾聚保崑崙寨推璞爲長獻賊環攻璞以計多所斬獲寨賴以全嘗上剿撫八策於撫軍黃配元召致麾下會省親歸寨遇寇被執大罵不屈賊支解之

一統志

陳貞申潛山人郡庠生少負志節有文行崇禎丁丑爲流寇所執不屈賊曰爾秀才可爲我供書寫貸爾死貞申厲聲曰我豈爲賊役者憤罵不已賊支解之同邑徐益隆諸生王世美明經吳自周以明經爲九江訓導皆罵賊不屈死又徐顯問諸生聞

京師陷赴江死王立邦罵賊死旬日潯暑面如生

江南通志
安慶府志

劉守中字禺中潛山人崇禎中以明經授涇縣司訓乙酉五月

南京覆知縣王先甲遯邑紳士推署邑篆八月涇城破守中懷

印死涇志載名宦

江南通志

韋燧字立吾太湖庠生與弟炳弟焜皆有勇力崇禎八年流賊

犯境燧糾里人殺賊千餘十一年賊眾大至燧力不支與炳焜

均戰死

太湖縣志
新增

邱全潛山人土寇攻崑崙砦脅全招降全至砦門大呼固守勿

降賊剗其腹而去

江南通志

王鼎臣吳夢暘雷棉祚俱太湖生員崇禎十年被賊執不屈死

江南通志

戴君德太湖生員通五經精律數著有古史斷行世少孤事母

以孝聞崇禎壬午流賊陷城憤罵不屈死之妻沈氏如雷氏攜
兩女孫同赴水死同邑生員雷膺祚雷廷發阮之甫黃應龍俱
以守義不屈死

江南通志
太興縣志

何大同字子野宿松廩生崇禎壬午流寇猝至被執擁至寨下
曰爲我呼開寨門同不應又擁至一寨曰前堡爾家所在今河
速賺之同罵曰孰非戚里我豈以一命陷彼數百命哉遂遇害
同邑柴維煥字有文遇賊被執見其軀幹強大欲強之俱不屈
殺其子以脅之遂與三子同被害又同邑陳昌言字展銘庠生
夏時行字生之廩生皆不屈死又石思琳字中潤以禦左兵死

江南通志

陸王猷宿松人以武舉授把總力能扛鼎崇禎十年守鄧家店
殺賊甚多賊憾甚合圍擒之斃分其肉而死

明史陳
于王傳

國朝乾隆四十一年自陳學良以下並

賜祀忠義祠

勝朝殉節諸臣錄

許球桐城人崇禎庚辰應募爲兵馬司指揮癸未蘇撫張國維

請兵以球領鎮江兵扼淮河渡口賊夾攻之奮戰陣亡

桐城縣志

方承宣字孟相桐城拔貢官休甯訓導休饑申請賑卹流寇擾

境竭力守禦甲申闖賊陷京師承宣悲悼絕粒而死

休甯縣志

張鳳翥宿松人崇禎辛未進士知嘉興縣發弊懲奸吏皆畏懼

民苦久役值編審行均田法至今攸行累官兵備副使分守承

德護顯陵薦推巡撫未任闖賊東下登陴嚴守而郡屬開門迎

賊鳳翥身受三刃扶創走郢鄂募兵恢復死於路

江南通志浙江通志

徐際相太湖人署龍山營守備闖賊餘黨焚掠斬黃將抵湖時

新破後城無居人際相率兵保邑令於許家寨賊至堵禦殺數

十人以無援力戰而死

太湖縣志

鄭之僞潛山諸生流寇入潛率鄉眾保聚飛旗堡見堡眾漸爲

賊所搖惑欲單騎出奔爲讐家先以情告賊遂被殺

安慶府志

馬之球桐城人崇禎壬午寇至與弟之瑚聞道省親猝遇賊脅

降不屈遂同死從弟達亦不屈死同邑許學賜汪迥方君簡陸

銓項希凱胡順祖又庠生吳道悅皆以罵賊不屈死

桐城縣志

許學傑桐城人壬午賊至扶父避山中被執將殺其父學傑號

泣請代賊釋其父而殺之

桐城縣志

胡自琳桐城人寇獲之脅使前驅不從被刃腸出而罵不休遂

死之

桐城縣志

雷之威桐城武舉官肇慶營守備致仕歸流寇擾桐之威保護

四鄰賊恨而合力攻之遂被害

桐城縣志

吳用享桐城庠生流寇掠桐用享率鄉人與戰連破之後以無

援眾散遂與妻楊氏及子女皆死

桐城縣志

王焱桐城人署六安營都司守固始崇禎壬午二月奉檄赴皖

遇賊寇桐力戰不屈死

桐城縣志

齊維熊桐城諸生崇禎壬午自六安歸遇賊北峽關誘降不從

叱之跪不屈罵不絕口死之

桐城縣志

王之慶字修祐望江人以明經知尤溪縣乞養歸親喪哀毀骨

立流寇偏境之慶聯鄉里爲人和社以捍禦之甲申京城陷勦

哭不欲生左兵東下良玉死其子夢庚降陰請屠望江城之慶

以計排之得紓其難鎮臣徐勇欲用爲黃州守之慶行至九江

投琵琶亭後小池死

望江縣志

胡如琨桐城諸生史可法督師揚州開禮賢館招致四方之士

如琨與焉薦授監紀推官揚州破可法殉難如琨死之

桐城縣志

馬懋功桐城副貢福王時高宏圖薦授杭州通判去從萬元吉

守吉贛擢監軍僉事湖西兵備參議出督水師被截焚舟赴水

死

桐城縣志

左德球桐城歲貢官湖廣沅州知州城破德球死之德球卽諸

生左旗之父也父子皆以忠節死士大夫莫不哀之

桐城縣志

張士繩桐城諸生崇禎丁丑避賊鷄籠山賊至拒之鬪死

桐城縣志

周昌洛桐城人丁丑賊至執其妻王氏欲辱之昌洛奪賊刃刺

賊遂夫婦皆爲賊剖死

桐城縣志

周昌岐字守一桐城人周昌洛之兄也父歿廬墓三年鄉人推

爲團長拒左良玉叛兵後死於淝水之戰

桐城縣志新脩

許世珠桐城諸生家舒之高峯遇賊被執不屈死其妻胡氏聞

而趨視之一慟而絕於屍傍

桐城縣志

朱兆祥字鳳儀桐城舉人知湖口縣民立生祠歷官鄭州知州以外艱歸築室墓側流賊充斥入城竭力守禦左兵破安慶北

拜撞石而死

桐城縣志

孫光裕桐城人考授中書舍人天啟末瑯嶲熾乞養歸左兵陷

城端坐罵賊而死

桐城縣志

馬懋贊桐城廩生左兵入城與弟懋修爾恪俱不屈死

桐城縣志

沈瀾宿松庠生賊至索金帛不答惟大呼逃竄之人曰爲語吾

弟善事老母遂罵賊死

宿松縣志

劉宗仁太湖庠生憤闖獻二賊充斥繕疏赴南京進呈格不得上慟哭還自沈於江而死壬午獻賊陷城其族劉必龍與戰死劉氏同死者諸生從善從龍之傑之炎之兆之吉之仁闖賊陷

都城諸生劉必登與其叔士元士魁弟必善姪孫明榮望闕叩頭投石龍潭死是時諸生不屈而死者尙有彭法聖張自達吉

天相萬元吉章明寵許詒元王家仁黃祚增諸人

安慶府志太湖縣志

嚴明炤潛山人流寇偏境侍母不去賊至叩頭求免賊釋之後

母卒又爲寇執毅然曰向爲親屈今豈可再辱遂憤而闕死之

同時諸生鄭著中朱應旂鄭邦符謝嘉猷金承裘葛廣皆以罵

賊死又盧勝任盧全錕張應慶皆不屈死

潛山縣志

張棟潛山人與母徐氏媳馬氏義不受寇辱赴水死

潛山縣志

盧繼治潛山人年僅九齡賊愛而撫之大怒罵賊而死

潛山縣志

張一鯤太湖庠生流賊猝至鯤以弓矢衛眾入山自倚大樹以

待賊眾縛之罵不絕口斷舌及肱以死

舊志

項惟德桐城人官陝西林夏衛經歷升四川布政司經歷甲申

獻賊破城惟德力鬪被執誘降不屈罵不絕口賊殺之妻巴氏及女婢皆不屈同日死

國朝道光六年

旌表建坊入祀忠義祠

桐城縣志

吳國琪字大玉桐城人贛州副總兵從唐王督師楊廷麟總督萬元吉守贛順治三年城破死之闔門殉難

桐城縣志新增

國朝汪吉字迪菴太湖人順治初以軍功授荊州遊擊賊小李等突犯當陽我兵駐防者寡吉奮勇當先挺身衝賊中堅手殺數十人身被數十創歿於陣事聞

贈蔭

賜祭葬

一統志

韓應震字伯卿太湖人

安徽府志望江人

順治己丑由明經授廣東信

宜知縣三年擢兵馬指揮未出賈遇寇犯信宜守將田自強叛
爲內應縛應震送寇營脅降之應震大罵不屈死雍正八年

恩准祀忠義祠

一統志

李甯和字文豹懷甯拔貢順治閒官廣東翁源知縣擒斬鐵腳
苗逆遷江西瑞州府同知逆黨狙於途射害之姪儵及家屬十
餘人死焉得

旨優卹祀名宦祠

懷甯縣志
新增

趙煥文懷甯人官陝西白水縣典史康熙戊午興安賊叛上官
檄煥文招撫賊執而脅之煥文厲罵乃拔舌剗目棄屍井中事
聞

贈主簿

賜祭蔭一子

一統志

徐益志字維升潛山人順治五年投誠授遊擊領兵平四十八堡連下十餘寨賊用向導從閒道襲破之罵不絕口死巡撫李猶龍旌以捐軀報國扁額

安慶府志

方希鼎懷甯人官撫標外委從征海寇遇賊金山戰死

懷甯縣志

江一龍懷甯人兄弟五人皆以勇力聞康熙初餘賊未淨鄉人奔竄龍率兄弟拒之敗賊於高河埠賊憤甚乘夜來劫龍不及備全家遇害賊去一鄉獲全五人力也

懷甯縣志

陳豹懷甯人由吳淞營守備左遷安慶撫標千總康熙甲寅調征祁門陣亡事聞

賜銀二百兩蔭一子

安慶府志

方相袞桐城人官邵陽縣黑田司巡檢乾隆乙卯征苗委運軍糧至麻陽滴水巖遇匪露刃脅降相袞厲聲罵賊死事聞奉

旨以知縣優卹祀昭忠祠給與雲騎尉世職無子弟相宸襲桐城縣志

雷陞字國材太湖人蘄州營兵乾隆三十六年從征大小金川

保行營千總越二年軍堵普後山梁夜偵賊砦受傷回營而死

太湖縣志

新增

吳學濂太湖文生乾隆閒在陝西雒南縣死教匪之難奉

旨祀商南忠義祠太湖縣志

新增

左堯臣桐城人官遂平典史嘉慶元年罷職投効湖北軍營屢

出剿賊斬獲百數值孝感黃柏山匪徒滋事隨軍往剿力戰歿

於陣事聞

勛卹祀昭忠祠子德昕給與雲騎尉世襲桐城縣志

盛殿元懷甯人安慶營千總嘉慶二年從征湖北教匪遇賊於

恩施縣五寶山陣亡

賜卹白金三百兩祀昭忠祠子襲雲騎尉

懷甯縣志

孫貴懷甯人從征教匪隻身夜往殺其邏者偽爲賊擊柝遂入賊砦大呼軍至賊驚起自相蹂踐死者數十人以功授千總後戰歿

賜卹白金二百兩祀昭忠祠以弟得榮襲雲騎尉

懷甯縣志

張紹庭懷甯武生以馬兵從征教匪數上首功大帥未及請而戰死

懷甯縣志

何廷佐懷甯人幼隨父遷陝西商南縣嘉慶元年教匪入陝糾鄉勇禦賊松樹溝有功二年賊破其營與弟廷彩廷芳廷玉俱戰死惟兄廷彥得免負母入山妻李氏罵賊賊射殺之事聞祀昭忠祠九年

敕如外委例議卹子孟保襲雲騎尉

懷甯縣志

龍魁望江人官守備嘉慶二年隨征剿匪於達州賊堅壁不出帥令求出奇制勝者魁乘晦銜枚入敵壘將舉火焚其帳賊驚覺圍之數重手殺數十人而死事聞

賜卹祀昭忠祠世襲雲騎尉

望江縣志

祝方中宿松人寄籍湖北爲郎西庠生嘉慶元年以率義勇距教匪功授八品銜二年春往援上津至七里礮遇賊力戰被執不屈死祀郎陽府昭忠祠子馨歸籍爲宿松諸生

宿松縣志

汪正乾桐城人僑寓郎陽教匪滋事正乾陳備禦計於邑令招集勇士與之協力嘉慶元年擊走賊將彭道遠於馬鞍山又破賊將吳名遠於黃龍山二年與賊魁徐

集川陝教匪事諸記載皆作齊

二寡婦

大戰馬鞍山寡寡不敵自刎死事聞

賜祀昭忠祠

桐城縣志引湖北通志

王士英張定國皆宿松人嘉慶二年以潛山營守兵隨參將諾音保征湖北教匪歿於陣八年

祀昭忠祠

宿松縣志

李榮華太湖人嘉慶二年從征教匪陣亡於馬河壩同邑石元陣亡於羊公頭又范申往陝西生理應募充鄉勇嘉慶七年陣亡於盩厔縣黑圪搭地方劉惟堯充湖北鄖陽縣鄉勇陣亡於上津堡均

敕祀昭忠祠時同郡奉檄從軍先後陣亡者營弁則安慶營防江守備李根長潛山營外委白榮安兵丁則郭連升白魁倪國政李世泰柯正元錢得龍王廷貴王以德馬迪慶王德榮呂升胡貴劉楷陳廣曹相劉魁陳得勝朱得成曹國華李楷雷福徐朝選王成玉陳人杰吳士全馬迪彩滕定國陳國泰懷朝貴熊華金元

馬春丁昌福李世榮沈加祿楊應魁楊得榮王定國聶龍詩馬
起龍蒯名高張迪華鄭華董祿楊得友張起雲張楷以上俱江
懷甯人泰許桂張安國柏愷李高魁楊正祥以上俱
桐城人徐得恩儲揚王世
綱朱華濮揚涂國林徐起鳳馬駒孫攀桂何吉馬良駒林恩勝
程安國王世泰王斌汪榮魁徐贊查雲高朱爵張元徐延珍孫
鼎紀榮祿徐枝仁張連高王定國李朝曹德元曹魁元王蘭牛
必貴楊占魁陸吉葉安葉安邦以上俱
潛山人均

賜祀昭忠祠

安慶府志

張忠恕太湖監生嘉慶三年從征漢中追剿教匪於城固縣之

柳林陣亡

太湖縣志
新增

唐義重龍登虔江彩高黃啟元汪榮山張孟達張國順張政國
吳宏富汪名月戴坤聯朱士貴方席佐李谷太王路阮玉陞汪

金山曹映登廖學武李善風羅光南廖湘武廖位南陳庭耀賀名遠吳一才俱太湖人僑居湖北皆死於教匪之難祀鄖陽昭

忠祠

湖北通志

太

吳恩濺桐城人嘉慶庚申以吏目揀發陝西值教匪滋事委解軍餉赴台站日夜奔馳目不交睫者月餘積勞卒事聞奉

旨加恩照歿於王事例

賜卹贈府知事祀陝西昭忠祠

桐城縣志

孫昇桐城人嘉慶十八年客滑縣知縣強克捷幕中賊匪亂與妾林氏俱死節事聞

賜祀昭忠祠

桐城縣志以上舊志

重修安徽通志卷二百三

人物志

忠節二

安慶府

蔡琪字子樹懷甯人浙江甯海知縣咸豐二年帶勇剿甯波土匪陣亡蒙

賜祭葬給世職祀昭忠祠

懷甯縣志以下新修

嚴錦堂桐城人浙江稅課大使歷義烏孝感知縣以能折獄善捕盜稱署海甯州判捕匪被害事聞

恩賜卹廕雲騎尉士民於長安鎮建崇忠祠祀之

桐城縣志

何法祖懷甯人安慶城守營千總咸豐二年同把總夏寅朱得祿張淦外委黃金印邵春榮營兵楊華馬洋方立本等在岳州

新牆驛剿髮逆陣亡

懷甯縣志

新牆驛之戰尙有千總章寶翎把總

齊能斌外委何翔齡周森兵丁高步青盧茂秦等七十二人均

陣亡

潛山縣志

又把總江占龍同子外委國才在南津港戰歿是年

千總汪萬青率營兵馬宏啟等百五十人在湖北省城堵剿髮

逆陣亡

懷甯縣志

儲金海潛山武生外委咸豐二年洞溪炳南侯中元涂國祥從

征湖南與髮逆戰於岳州新牆驛均陣亡金海世襲雲騎尉

潛山縣志

縣志

吳虎林字月樵桐城人廣西縣丞咸豐二年在廣西帶勇剿賊

陣亡蒙

恩賜卹蔭子入監

桐城縣志

洪運昌字以清桐城人廣西代理永福知縣剿賊陣亡世襲雲

騎尉

桐城縣志

王澤字克生懷甯人江蘇從九品咸豐三年假歸省親值髮逆東竄安慶陷父芳鏞守城被傷澤赴救禦賊死之世襲雲騎尉同時從九夏雲階亦死之蒙

賜卹

又把總吳尙廣八品銜徐世恩候選縣丞夏光前把總趙玉龍外

委趙承恩營兵楊士元詹錦楊玉周萬春王德彪均陣亡尙廣王龍並全家殉難差弁丁攀桂武生丁仁發從九品查懋杰汪瑞珍民人邵之尙趙宏塾張雨泉李興浩何本華張樹賢蔣祐齡蔣逸民均各闔門殉難未入流管連蓀諸生黃道隆洪兆鼐俱死之

懷甯縣志

徐昌潛山武舉以湖南新牆剿賊軍功五品藍翎咸豐三年從潛山營游擊德成至安慶省城禦髮賊於懷甯之九華嶺陣亡

世襲雲騎尉

清山縣志

盛啟泰懷甯人守備咸豐三年髮賊犯集賢關啟泰同千總嚴如龍朱占春王錦太把總楊升泰大烈馮斌馬鳳亭外委何永清吳得有附生艾懷高武生艾奪標艾春來八品軍功朱貴營兵吳學林義勇張應發黃塏等四十餘人均力戰陣亡是役也官軍分爲三路并守各隘守備徐鵬禦左路防江哨官雷陞兵丁潘長發義勇陳春陽均防新寨嶺張力廣等防圍山頸王曰倉暨子國樑等防小且記嶺子友祥等防石門均殺賊陣亡

懷甯縣志鵬字竹岑裏創力戰殺數十賊而後死之咸豐五年奉

旨祀忠義祠世襲雲騎尉子士勳襲後在巢縣東關陣亡

懷甯縣志

又六品

軍功馬聲發衝突重圍再入再出殺賊轉戰至桐城受傷死宣
憲武宣保泰韓春林等俱不屈死之

懷甯縣志

楊明發懷甯人參將咸豐三年同哨官楊昆在江西南豐縣剿
髮逆陣亡是年把總施鴻恩在懷遠剿捻逆陣亡千總邵春暉
外委朱發沈占魁軍功胡銑均從江忠源在廬州府殉難守備
銜王國賓民人張沅龍均在江甯省城全家殉難河南武安縣
典史徐大咸在任殉難

懷甯縣志

徐繩武潛山人千總兼恩騎尉世職咸豐三年調平廬州轉戰

臨淮傷重卒於軍又五品頂翎王玉在臨淮陣亡

潛山縣志

楊鼎勳望江地保咸豐三年典史張寶華之被戕也鼎勳稱好

官求釋不得亦死之

望江縣志

徐豐玉字子逢一字石民桐城太僕寺卿鏞子也智勇兼人歷
官貴州平遠威甯黃平知州郎岱同知署惠州府知府所至盜
賊斂迹訟獄衰息率勇剿黃平盜巢盡殲其渠咸豐二年擢湖

北黃州府知府值粵匪犯長沙調守湖南省城疊次擊賊自八月至十月圍始解時徐廣緒奉

命接辦兩湖軍務豐玉請進援岳州及移駐黃州皆不聽三年春

特旨授湖北督糧道旋署漢黃德道會同江忠源剿廣濟亂民方士相等斬平之是年夏粵匪自金陵分竄江西復擾湖北豐玉與道員張汝瀛軍田家鎮欲分營南岸半壁山兵單不可分乃列營江北又於沙嘴紮木牌城八月賊由富池口來攻迎戰連捷出木牌以礮轟碎賊船賊退回富池時兵勇纔二千餘餉復不繼屢請救援未至九月知府李標追賊至富池陷淖死賊船遂乘勢駛撲木牌別掠舟渡江北燒田家鎮營兵潰張汝瀛先死豐玉躍馬接戰手刃數十賊力竭自刎死之事聞

叙賜祭葬贈世襲騎都尉同治七年奉

旨予謚勇烈建立專祠子宗亮襲世職同時有吳冲謨字士衡桐城諸生從豐玉軍田家鎮事急豐玉使冲謨跳免不可遂同殺賊陣

亡蒙

旌卹如例

桐城縣志

方先甲字慎之上元縣歲貢方恩露字雨培上元縣副貢俱原籍桐城人先甲事母孝輕財好義能文章恩露從先甲學內行純篤著有文思堂詩文集咸豐三年江甯陷先甲夫妻子女闔門自盡恩露罵賊死之

桐城縣志方宗誠柏堂文集

張元煒字偉人桐城人四川西昌縣丞道光初成都孫占鼉之變擒獲首惡擢知縣歷石泉南部冕甯巴縣所治嚴平不苛蜀人感之咸豐三年在籍防堵城陷遇害祀昭忠祠

桐城縣志

張裕華桐城人衍聖宮啟事官在籍辦團咸豐三年同文童張

訓端禦捻被害

順天府奏案

又文童孫碩以辦團賞六品軍功城陷

被害

桐城縣呈冊

馬樹華馬肇元馬先甲俱桐城人樹華字公實由副貢江西州判擢河南通判告養歸建宗祠置義莊輯馬氏先世詩鈔太僕奏略翊翊齋遺書懷亭瑣記嶺南隨筆著闡幽彙記龍眠識略可久處齋詩文鈔肇元字六坪由增生舉孝廉方正學問淹通歷主大梁廬陽正誼各書院著周書年月考汲脩堂詩文集知足知不足齋筆記曉萊山莊銷夏錄先甲字毅卿由附監生官湖北巡檢告養歸均於咸豐三年城陷死難照陣亡例

賜卹祭祀昭忠祠世襲雲騎尉同族馬良斌字憲章馬德臨字景威

監生馬拱辰字晉康六品軍功馬雲衢字雨樵均死之良斌妻洪子福臻雲衢妾施女二人並從死俱蒙

旌卹祀祠建坊同時有從九品方是訓禦賊陣亡世襲雲騎尉又孝廉

方正吳調龍字子明訓導吳庭芬字仲喬文生王百藥字景芳
江潤字紉蘭葉杰字葭漁監生葉大薰字覲南從九品葉馨字
研農及姪聚奎鹽知事銜文生左稽颡字丹巖及其孫毓崧童
生何家駒姚子齡吳書宜吳熒孫鵬翼疏偉民人唐禮擲均各
殉難其闔門死節者有文生姚寶同醫士李東明李壽李元魁
從九品張同琨廩生吳振練總股其章倪敦吉監生鄧德燦鄧
德燦份生項大章均蒙分別

旌卹

桐城縣志

吳庭芬同治九年世襲雲騎尉

順天府咨案

王寶勝桐城文生六品頂戴咸豐三年同文童左崧吳孫默王
孝和項目余觀海余潮海張摛三帶團禦賊陣亡至同治九年

旌卹

如例

順天府奏案

馬瑞辰字元伯桐城進士由庶吉士改主事終員外郎緣事發黑龍江釋回潛心經學著毛詩傳箋通釋及崇鄭堂詩鈔咸豐三年髮逆犯桐城瑞辰命子星曙三俊等團練禦賊城陷星曙及其子諸生登瀛巷戰死其姪孫八和被焚死瑞辰被執灼背脅降不屈死之蒙

贈道銜星曙字仲榆監生豪邁尙氣節凡鄉里義舉如修學宮城垣考院江隄豐備倉平糶散賑皆不避勞怨而總其成及其被害蒙贈鑾儀衛經歷銜三俊字命之優貢咸豐元年舉孝廉方正三年賊踞安慶奉父命練鄉勇上書巡撫條陳攻守之策官軍始駐集賢關俄而挫退桐城旋陷三俊痛父兄姪姓皆死於賊亟圖報復四年與知縣成福參將慶麟摺勇霍山約提督秦定三軍圍舒城慶麟軍襲潛山太湖而自帶勇襲桐城三路會剿行至中梅

河秦慶兩軍不至三俊遂入舒城縣之周瑜城援絕糧盡賊夜襲之力戰死事聞奉

旨優卹與瑞辰星曙等建立專祠均各世襲雲騎尉三俊子復震由世

職從征積功歷官總兵輯三俊文字爲馬徵君遺集

桐城縣志柏堂文集

周元貞桐城監生桐俗東鄉多強毅習拳勇之士周氏族大尤著名咸豐三年元貞團練鄉兵與族人永年率以禦賊戰死城南東鄉人恨賊刺骨歷年獲賊生埋及對仗殺傷者不可勝計而周氏亦陣亡駿發等五十五人巡撫翁同書曾以其義勇奏聞於

朝東鄉益以殺賊自効自後戰賊於茶花嶺陣亡周受百等二十人於馬鞍山陣亡周典謨等三十一人於梁王廟高懷嶺陣亡周友和周芳霖周怡元周咸元周夢珠等而卒能保境以免荼

毒又有監生周汝敬者曾助餉官軍被賊刦至廬江羅昌河服

毒死

方宗誠兩江忠義錄

張勳字小嵩桐城諸生嘗倡瘞枯骨千餘具置恤養育嬰公費招集鄉兵擒斬土匪桐城陷走舒城六安乞師於呂賢基江忠源圖恢復不果咸豐四年宿遷舉人臧紆青帶勇來規桐城勳迎之爲先鋒四戰皆勝卒同紆青陷伏死時有吳文謨者字翼甫往歲從勳奔走請兵備歷艱辛及是亦與於難均蒙

旌卹

桐城縣志

鄭承荃鄭承基鄭太俱懷甯人咸豐四年帶勇勞松柏等在太湖堵賊均陣亡撫標營兵陳占魁亦於是年在廬州剿賊死

懷甯縣志

周繼鴻把總葉榮處六品軍功俱潛山人咸豐四年率勇擊賊

先後在九華嶺龍井關陣亡吉升從榮處死之是年外委范履

祥亦戰歿

兩江忠義錄

張健翮太湖武舉青陽縣城守千總咸豐四年青陽城陷巷戰

死

太湖縣志

李世臣字贊平太湖人廣東鹽經歷在籍捐資辦團咸豐四年粵賊犯太湖城陷力戰被害妾陳氏子德貽均死之世襲雲騎尉是役也武舉余青雲諸生周祖鍾帶勇守北門庠生王宗維守東門監生路世錚守舊東門監生李振源守南門諸生周湘張海融監生周玉庭周鼎銘守西門廩生趙國鐸練總章昌裔從九余政均余哲明附生周進余文魁周道南祝泰豫余祚春武生余祚雲童生趙繼蕓李鳴鑾勇目路得青等均禦賊陣亡余青雲余政均並同治二年照把總例世襲雲騎尉王宗維等

均咸豐間

旌卹 太湖縣志
兩江忠義錄

蔣慶曾字稼田太湖廩生能文尚氣節咸豐四年縣城陷慶曾

驅家人自裁挈其子赴泮池死九年

旌卹著有滄遺閣稿 太湖縣志

王邦杰廩生王家煨武生俱太湖練總咸豐四年在宿松禦賊

陣亡於同治二年蒙

旌卹 宿松縣志
太湖縣志

賀映黎字弼侯議敘八品吳賀秉字淮芳議敘九品俱宿松人

宿松之賀氏吳氏一族也亦復稱吳賀云映黎事親孝嘗割股

療父病又與同祖兄弟捐助軍餉萬餘金咸豐四年同其族孫

秉督勇隨官軍收復太湖縣城又同剃髮逆於宿松之界陟河

連斃數十賊逆股由楓香驛來攻腹背受敵映黎陣亡秉被執不屈死之均世襲雲騎尉

宿松縣志

宋昌期字則菴望江舉人署湖南華容知縣咸豐四年教匪糾髮賊薄城昌期募勇固守會合援軍追擊走之尋復率眾來圍困守十餘日糧盡城陷昌期懷印自經

恩邱祭葬贈知府銜蔭子州判

望江縣志

孫耀衡懷甯人把總咸豐五年任懷遠帶勇陣亡又六品軍功鄭永清在廬州六品軍功馬榮美在六合六品軍功王寶書兵丁何慶華盛宏標等在巢縣均隨剿力戰死

懷甯縣志

張聰榮字戟門桐城人六品銜咸豐五年在廣西全州死難蒙

賜旌

桐城縣志

石正鈞字振初宿松人江西從九品咸豐五年髮逆由湖北竄

擾江西義甯州陷正鈞奉差在州殉難眷屬走饒州遇賊闔家

赴水死

宿松縣志

陳洛周字伯鴻懷甯文生候選知縣咸豐六年在潛山禦髮賊受傷死是年六品軍功鄭士華與賊戰於潛山之一柯松把總馬龍彪軍功馬聲明曹德恆兵丁馬家良與賊戰於廬州之梁園雲騎尉徐士勳營兵王淦臣戰於巢縣兵勇張升宋必貴王貴玉戰於桐城均各陣亡外委邵楨六品軍功邵樽把總蔡長泰營兵陳建勳等剿捻賊於懷遠同時戰死又巡檢管兆蕃衛千總管齡父子在上元縣之淳化鎮五品軍功馬順清在六合俱剿髮賊陣亡管兆蕃並全家殉難

懷甯縣志

張緯桐城人江西廬陵縣富田巡檢咸豐六年在富田泚地之

男子橋剿賊陣亡世襲雲騎尉

桐城縣志

方善福桐城人咸豐六年官軍駐桐城與賊相持善福與叔傳

書捐餉爲一縣最師潰被執不屈死

桐城縣志

劉輝閭潛山武生千總銜隨官軍復潛太各城咸豐六年禦賊

被執死

潛山縣志

計德祥潛山人桐城天甯莊外委以功保藍翎把總咸豐六年

在懷遠縣陣亡

潛山縣志

王三畏潛山人六品軍功咸豐六年會同霍邱棟總劉遐志擊

髮賊於潛山西門陣亡世襲雲騎尉同時從三畏死者十七人

又蘇洪巷戰死聶大有追賊陸家店死

潛山縣志

儲寅潛山廩生嘗率親黨守三和山扼險禦賊咸豐六年助官

軍收復縣城會乏食鄉兵散歸寅復傾家餉眾得三百人間城

復陷嘔血仆地半日而卒

兩江忠義錄

宋沛霖潛山人咸豐六年會同霍山練勇攻賊追至陸家店被圍戰歿兄作霖於次年戰賊黃龔中鎗死叔慎階族弟曲譜同時被害又六品軍功劉蘭初在懷遠陣亡

兩江忠義錄

周興盛太湖監生成豐六年在舒城法華寺率勇剿賊眾潰

血死

兩江忠義錄

方道由太湖人咸豐六年隨剿潛山踞逆克復縣城已而復陷死之祀忠義祠

潛山縣志

楊誼蓮懷甯廩生成豐初集團助剿籌備軍米七年禦賊廣村被害又文生黃焯馬迪元俱殉難

懷甯縣志

鄭自耀字午橋懷甯人雲南經歷洊升同知署景東廳咸豐七年者千賊匪竄入瓶罐口防勇戰潰自耀督練前進被圍陣亡同死者百餘人

贈道銜優卹准建專祠是年副將嚴鴻猷在直隸南樂縣東都司程富元在河南滑縣都司汪長福在山東商河縣俱剿捻逆陣亡六品軍功戴存慶在廬州府千總彭立正在和州團勇葉春發等在休甯蔡長發等在合肥馬龍標等在巢縣俱剿髮逆陣亡

縣志

姚世恩字孝寬桐城人從征廣西由軍功官江西贛州府經歷代理定南廳同知咸豐六年夏七年春髮賊兩次圍城世恩激勵士民堅守卻之賊退世恩履勘村堡隨兵不及千人賊大至轉戰至九曲水受傷陷陣而殞奉

旨優卹世襲雲騎尉

桐城縣志

張開運字子斌桐城人咸豐初陷賊中自拔得出六年官軍與賊相持開運及同縣黃甲趙乙等二十五人說賊中偽職爲內

應與官軍約屢失期七年師潰賊得開運交通狀遂被害二十
五人之家俱受禍開運臨難前日遺友人書言得死所無憾惜
不得樽酒痛飲訣別耳其從容如此

柏堂文集

劉恆茂郭德元俱桐城人咸豐七年率勇禦賊先後在白石嶺

黃柏嶺陣亡

兩江忠義錄

王之由潛山監生咸豐七年同儲漢江儲孔書等帶勇襲賊湯
池阪與丁克儉等二十二人俱陣亡又有吳效坤手刃數賊與

儲義林儲桂廷儲保身儲禹桂汪東海劉公英俱陣亡

潛山縣志

江忠義錄

楊前智潛山監生咸豐七年同陳崇禮儲浦遐帶勇數百禦賊
黃沙嶺均陣亡是役王達才率彭光烈等百二十三人余能甲
同余贊疇等十餘人自成一隊黃春才同劉訪賢等十六人六

品軍功儲萬疆率儲蘭桂雷禮和等三十六人俱在黃沙嶺戰歿歲貢徐琛首先起團及是團敗自經均蒙

予卹祀

上清斑竹阪忠義祠又武生劉長青及華直道汪德懷等七人王冠羣葛世慕楊敝林及黃永升等二十二人均以帶勇擊賊

陣亡

潛山縣志

程金殿潛山人咸豐七年同程朝班等九十人操九保等十四人及余行衛等均力戰髮逆於湖田等處陣亡縣丞王春亦禦

賊死

潛山縣志

徐宗勝潛山人把總咸豐六年從秦定三克復舒城七年轉戰

屯埠營潰陣亡

潛山縣志

宋如虎潛山武生六品銜咸豐七年禦賊黃龕陣亡世襲雲騎尉又程高升在牛肩嶺陣亡彭賢相彭賢文蔣顯名均各闔門

殉難

潛山縣志

董傳薪字克甫太湖監生成豐初助軍餉五百金七年約團剿賊南陽河被執不屈死是年十月賊破新倉卡練總何清岳胡恆豐戰死監生汪發乾汪咸林諸生何元音何元珠在渡船口葉大文章景雲在龍山麓章福兆王燕卿王玉堂等十六人均在宿松之汪公嶺帶勇禦賊陣亡十一月賊破香茗山東西長冲練總軍功八品黃澤笏六品徐豔培五品王鳳池文童王德潤吳家岐甘纂之劉振端監生何熾胡傳慶同子秀鑑俱帶勇陣亡練長何占春練勇詹來之舒祈連張義玠阮儒先方傳金余忠貫皆陣亡

太湖縣志 宿松縣志 兩江忠義錄

李達春太湖人咸豐七年官兵集宿松達春率丁壯由茗山茅嶺進攻賊營殺數十百人獲偽監軍李鳴玉於新倉渡口賊由

詭道來戰受重傷退三月堵賊桃花鋪被執殉節又章遵伊在
來子廟嚴克昌在楊畢林及章邦林舒鸞翔何如春嚴時清盧
義書嚴寓中吳保和諸生朱旭初均於是年帶勇陣亡其效死
守卡及攻賊營者又有諸茂松劉本銘軍功黃錫祥及余安康
等

兩江忠義錄

程甫亭望江人咸豐七年賊營張北山甫亭率眾燒走之與程
樹椿鄧乘先武生陳佐濤均力戰死宋逢佳胡汗青陳繼勳蔡
賡良李春田劉沃生方揚名等均陣亡於同治七年

旌卹

望江縣志
胡肇智奏案

王芳鏞字韻如懷甯人

貤封朝議大夫安慶之初陷也芳鏞率勇稽查西城受傷未殊從者昇
奔潛山醫治得甦遂在潛山帶勇咸豐八年與髮逆戰於水吼

嶺大關死之蒙

恩邱如例是年練總黎燮文童李必成六品軍功江奎監生程里萬子

富文暨馬家珣程廣仁韓錫松汪大綱汪鴻猷均死之黎燮汪

大綱汪鴻猷並全家殉難芳鏞次子廣先於六年在淮揚殉難

懷甯縣志

張翰懷甯人江西大庾縣典史咸豐八年大庾城陷同生母趙

氏妻妾子女八人投塘殉節

懷甯縣志

盛時舉懷甯人雲騎尉守備署廣德營都司咸豐八年帶兵剿

灣沚賊陣亡是年外委江占先六品軍功孟蘭生戰兵洪占奎

書吏江在廣游慶恩張克鵬均在定遠外委張吉祥武舉吳香

桂六品吏員雷斌營兵曹起發李金亭均在廬州邵必貴在宿

松程安文程康耀洪蘭階洪東巖在霍山俱各陣亡安文康耀

之家屬並殉難

懷甯縣志

葉球字叔華桐城進士由庶吉士改主事洊升郎中以克復高唐功加道銜咸豐七年補江西南安府知府八年粵賊竄境固守七晝夜援絕城陷與從兄附監生璫及璫子從九品湛恩俱巷戰死蒙

恩從優卹贈祀昭忠祠均世襲雲騎尉

桐城縣志

董澂鏡字思陶桐城舉人官懷遠訓導咸豐初屢與知縣會籌防堵以功保知縣八年捻逆竄懷遠縣治失守澂鏡死之蒙

恩卹蔭祀昭忠祠

桐城縣志

朱蔚文桐城人力學課徒著有芙初詩草咸豐八年官軍復縣城蔚文率子伯齡與族人維善道新爲練總數月城復陷蔚文伯齡維善道新均死之同時練總葉瑞廷監生徐若符與團勇

戴根貴等三十人均陣亡方大悅方根生白純語甘南薰均不

屈而死又軍功吳庭樹禦賊烏石岡陣亡

桐城縣志
兩江忠義錄

王緒爵潛山人嘗率勇扼大關口又戰賊湯池阪黃沙嶺咸豐

八年賊竄天堂緒爵堵剿死之是年儲瓊玖在後河山徐全秀

在楊家河徐龍年在溪石河及劉復修俱以帶勇陣亡

兩江忠義錄

王興熾守備周岐山千總周立誠把總俱太湖人咸豐八年調

防甯國府俱在黃池陣亡

太湖縣志

周濟美唐丹墀唐有德俱太湖人咸豐八年禦賊赤岡陣亡是

年王正南在司空山紮寨防堵鄭調民率子德普在分茅嶺陳

正之率子咸祥在江家河均殺賊陣亡

太湖縣志

劉焱望江庠生咸豐八年辦團練同朱承烈胡應鳳汪連城等

帶勇擊賊均死之是年武生吳斌同韓美泰陳其福曹法元等

擊賊斗笠山練總方攀甲曹哲士帶勇擊賊老鴉灘均死之攀
甲之父庠生錫榮率子弟殺賊十餘人力竭與三子觀光及勇
目姜先益等百八十一人皆遇害又徐炎帶團防堵被執遇害
均祀昭忠祠劉焱

恩卹銀兩

望江縣志
胡肇智奏案

王元潛山武舉咸豐六年從李元華復潛山城已而仍陷八年
李續賓再復潛山旋有三河之挫潛山復陷元死之是年張德
彩亦帶勇禦賊陣亡王秀巒率徐林中等余芳聯同汪立德汪
立言等俱禦賊水吼嶺陣亡

潛山
縣志

儲萬理儲篤因俱潛山監生咸豐八年禦賊月亮塘陣亡均同
治年

贈從九銜世襲雲騎尉萬理等並一門殉難是年儲景新同兄道傳帶

勇月亮塘與姪春麗春波春鳴等三十五人曹丙炎林殷傳等
百餘人均死之儲萬祺儲春芸帶勇揚旗嶺朱貴宗張京元王
心維帶勇牛肩嶺與吳蘭桂邵名揚王楚材王銘勳等俱禦賊
死

潛山縣志

朱玉衡字秀立潛山諸生咸豐初倡義團練助官軍克復城池
七年賊竄天堂玉衡駐軍黃沙嶺會同本縣及霍山團練二千
餘人大戰嶺下殺傷甚多賊乃繞道抄襲義勇死六百餘人八
年隨知縣克復縣城聞三河軍敗嘔血斗餘卒

兩江忠義錄

周芳寅字汝靜桐城監生嘗捐助軍需咸豐九年率勇禦賊縣
東被殺於羅昌河豪

邱蔭如例同時練總余興春在黃檗嶺鮑得財方勝傳詹強林在黃家
山左梅溪在響水澗俱率團力戰死

桐城縣志

旌卹

胡擊智奏案二

章公敖桐城人六品軍功咸豐九年同其族人虎臣二貴三爵友貴全仕文秀道麗道勝道美禦賊陣亡於同治七年

章汝鼎桐城人世居東鄉族眾與周氏相埒咸豐九年率族禦賊於黃槩嶺白石嶺孫家阪高家坳殺賊無算汝鼎與章冠鼇等十二人先後陣亡其後章同春率族章桂一等在廬江樊山章如海率族章太和等在馬鞍山均於十一年戰賊死之

兩江忠義錄

儲開元潛山武舉歷署泗州千總咸豐九年從葉兆蘭在兆營擊賊水吼嶺葛蒲潭等處與六品銜武生儲烈俱陣亡均世襲雲騎尉

潛山縣志

汪春濤儲耆才聶世芬汪炳南儲士彥

一作硯

俱潛山諸生咸豐

九年帶勇從知縣葉兆蘭禦髮賊破之於水吼嶺及槎水等處陣亡均

贈訓導銜世襲雲騎尉祀上清斑竹阪忠義祠者才一門八十餘口士

彥十餘口先於八年月亮塘之戰均各殉難槎水之戰王必興

首先陷陣死

潛山縣志

徐貴馨潛山人州同銜咸豐九年倡練禦賊逆水阪陣亡

贈知州銜世襲雲騎尉子子元承襲後亦殉難又王有貴馳援逆水阪

殺賊數人而死

潛山縣志

朱上林潛山人咸豐九年帶練堵賊於盱眙之曹家大港陣亡

又汪名炳在盱眙闔門俱死之

潛山縣志

童壽春太湖人咸豐九年紮熊家砦屢挫賊鋒鏖戰陣亡

太湖縣志

殷胤字乙亭太湖舉人任定遠訓導咸豐八年同知縣周佩濂

率勇禦擒賊屢有斬獲九年城陷亂冠帶坐講堂被戕事聞

賜卹世襲雲騎尉定遠人祠祀之

太湖縣志定遠縣志

趙馥懷甯監生咸豐九年在天長守城與團丁潘貴俱陣亡是年守備甘全把總雷春和外委鄧弼團丁楊松柏俱在定遠攻擒匪陣亡營兵謝廷魁在店埠江山太在夏閣王俊在桐城東鄉禦賊戰歿

懷甯縣志

魯常字碩甫懷甯舉人睢甯訓導端士習正文體甚有名稱病去官避地蘇州咸豐十年蘇城陷賦絕命辭同妻女等投湖殉難從弟壽昌同死之是年文生楊蔚生在杭州殉難

懷甯縣志

李世楷字光微懷甯武生寄籍滁州同弟童生光耀辦團練屢敗賊於盱眙殲賊於滁州南咸豐十年世楷戰敗及光耀皆死之同治七年胡肇智奏蒙

旌卹又是年總兵銜參將張振魁在山東濟南陣亡從九品丁澤東從
 征江甯五品軍功饒功健文童饒功銓白慎修白允階禦賊江
 甯三汊河監生何鴻儒在集賢關守備葉廷芳在桐城四品銜
 舒坤二在盱眙河石橋均力戰死又江振泰張孝思采辦多隆
 阿營米劉德修辦理甯國糧餉均各殉難樓甯縣志
 張開馨字香巖桐城人浙江從九品咸豐八年署常山典史髮
 賊犯境竭力防堵十年委巡省城清波門城陷與桐城文生陳
 裕源死之均

卹蔭如例又舉人葉潢監生葉潯浙江縣丞葉泳泳弟嘉淦俱在杭城
 閩門殉難桐城縣志

熊光洛潛山人廣東布經歷在浙江帶勇陣亡又前浙江石門
 知縣熊光煦在籍禦賊捐軀潛山縣志

熊光湖潛山人布經歷禦賊陣亡於同治十一年

旌卹祠坊黃鉅奏案

張臻懷甯人江蘇從九品咸豐十年在常州府帶練巡防城陷死之

恩卹銀兩世襲雲騎尉江蘇奏案

朱溶桐城人縣丞咸豐十年曹州府屬打仗陣亡世襲雲騎尉

順天府奏案

胡世傑桐城人從九品咸豐十年帶勇禦髮賊陣亡世襲雲騎尉是年姚芳林左東海汪永言潘鵬萬團練禦賊戰歿芳林妻室子女並死之吳壘率練堵賊楊梅山與周志才王照明均死之諸生張驥在西鄉汪良珠在高嶺山阮北城在曹家岡周彩和在義津橋張玉荃在雙港鋪俱帶勇禦賊陣亡諸生伍職伍

鈞王印蘇保求均各殉難

桐城縣志

吳承頤桐城監生咸豐十年在甯國小東鄉闔門殉難子希庸縣學生在江西聞家難服毒而死

桐城縣志

馬景恆字德符桐城人湖南黔陽縣典史咸豐十年調署綏甯城陷殉難世襲雲騎尉

桐城縣志

崔含英崔守信俱潛山人六品軍功咸豐十年禦髮逆於剡蒿

阪均陣亡

潛山縣志

羅遵殿字澹村宿松進士道光中由直隸唐山縣知縣洊升浙江湖州府知府弭烏程等縣譁漕之變建歸安書院擒劇盜百餘治行第一調杭州擢湖北安襄鄖荆道甚有惠政咸豐二年粵匪陷武昌遵殿赴楚豫交界之黃渠鋪會拏土匪三年徧歷下游履勘形勢駐兵防剿四年督帶兵勇防堵石灰窯歐家集

小河等處派隊扼安陸至府河一帶剿賊疊勝克復潛江京山等城六年遷兩淮鹽運使仍畱湖北襄辦糧臺七年升湖北按察使八年升布政使時巡撫胡林翼統兵出省凡用人行政籌運餉糈悉倚遵殷九年授福建巡撫調浙江巡撫浙省向供甯國一軍恃以堵禦門戶故省城久不設備遵殷到任畱心吏治籌畫軍需方思整軍選將自固邊防咨調楚軍蕭翰慶援浙未至十年二月大股賊匪卽由甯國竄入倉卒登陴設守援絕城陷死之妻女眷屬闔門殉難當經

文宗顯皇帝降

旨優卹嗣因御史高延祐奏參將卹典撤銷嗣治元年曾國藩奏遵殷以死勤事懇照初次

諭旨給予優卹得

旨允准

贈右都御史銜

賜祭葬諡壯節史館立傳建立專祠世襲騎都尉遵殿外任二十六年

身後止薄田四十畝土屋十餘間云

史館鈔傳 表忠錄 浙江忠義錄

陳韜字龍巖懷甯人江蘇知州調辦杭州團練咸豐十一年杭
城陷率勇巷戰死韜父廷弼任嵊縣典史率練剿賊傷亡韜子
候選知縣珩戰死俱於同治七年

旌卹

懷甯縣志

韜世襲雲騎尉

浙江奏案

杭城之陷也從九品龔銓同子乃俊乃

輯均巷戰死

懷甯縣志

方華字樹蘭桐城舉人浙江知縣咸豐十一年委防慶春門城
陷率勇殺賊與子縣丞堃同死之全家殉難於同治六年

旌卹世襲雲騎尉

桐城縣志

許谷良桐城人咸豐十一年率眾馬鞏山禦賊陣亡又監生王

琳率勇擊賊麻馬山被執死之

兩江忠義錄

周顯啟太湖人把總從軍浙江咸豐十一年八月髮逆竄東陽

顯啟引隊接戰陣亡是年十一月杭城再陷太湖人侯選巡檢

王立屏守鳳山門巷戰死之

太湖縣志

王興茂太湖人把總咸豐十一年在杭州城外陣亡

太湖縣志

張用煦桐城人浙江縣丞巡防武林門咸豐十一年城陷死之

恩卹銀兩祠坊世襲雲騎尉

浙江奏案

姚葉蔡桐城人未入流委帶浙江礮船迎護糧米咸豐十一年

在錢塘江遇賊接仗陣亡於同治六年

恩卹銀兩祠坊世襲雲騎尉

浙江奏案

方宗源桐城人浙江富陽縣丞城陷殉難於同治十年奏請

旌卹

浙江
奏案

陳崧廩生朱紱監生孫述命練總俱懷甯人籌辦官軍務糧咸
豐十一年均被髮賊所害崧兄大受同死之練總王堯賓練勇
江萬村何忠懷阮鳳美程康昇潘堯明潘成章潘曙嵐潘懷和
民人費永林於孟元於學才黃步曾俱禦賊陣亡高超凡甯葬
玉余繼貴爲官軍偵探幹辦遇賊被害歲貢程楠江不食死監
生陳臻胡筠諸生潘鈞汪蔚其江從辛侑生丁志大葉祥禮醫
士鄭古儔均殉難徐毛保鄭必安胡祖堯鄭長興胡東昇劉照
庭徐德鳳文生王太平均各全家殉難

懷甯志

張學雲都司銜守備吳長春五品銜千總俱懷甯人咸豐十一
年從巡撫翁同書駐壽州禦苗逆城陷巷戰死是年六品軍功
楊儀文從提督楊岳斌圍安慶剿髮逆中礮死衛千總張啟鴻

外委濮得元從征江甯勇目丁萬福調防祁門均各陣亡

懷甯縣志

吳樹滋桐城人咸豐九年率族眾拒髮賊於黃檗嶺子履坤龍

文皆陣亡十一年樹滋復糾眾禦賊力竭赴水死是年諸生陶

躍麟在廬江被執不屈死廕雲騎尉又監生王琳字墨書嘗籌

助軍餉是年率團擊賊麻篤山六品軍功章二桂帶勇堵賊斗

潭陶鑒傳率勇禦賊鮑家店均各陣亡監生光勳字瑞六家饒

於資遇水旱災竭力賑濟及是年七十餘矣率里人團防禦捻

逆祿峯口練潰遇害庠生嚴鈞率子嘉甫宗培團練禦賊均死

之吳發宇吳永貞吳愛德江寅清程曉文蘇振森蘇漸能蘇漸

儀楊得眾謝擇之並死之

桐城縣志
桐城呈案

王樹勳字堯賓桐城庠生咸豐十一年在河南汝甯府禦捻賊

陣亡

桐城縣志

余茂林王心平劉士才胡集星俱潛山人咸豐十一年禦賊油

坊壩陣亡潛山縣志

戴長庚字獻亭太湖人四川安縣典史咸豐十一年髮賊竄安

縣城陷長庚與弟文華均巷戰死

賜卹如例太湖縣志

周秀華太湖人寄居宿松咸豐十一年率眾堵賊雙墩陣亡兩江

忠義錄

姬文奎懷甯人六品頂翎外委咸豐間與從九品仰臻邵必雍

文童趙郁才宜邦翰宣禮保陳喜禮偕生丁顯達均禦賊陣亡

於同治七年

旌卹胡肇智奏案

張同登字鏡江桐城進士用雲南知縣補大理府之雲南縣軍

功升知府護巡西道督剿回匪在祿豐陣亡奉

旨優卹建立專祠

桐城縣志

黃爾康胡子宜俱桐城人從九品先後隨營殉難均世襲雲騎

尉又從九品李遠儀陳名遠胡濟吳秉成方緒澄守備范錫之

咸豐年間先後在籍禦賊陣亡俱世襲雲騎尉

桐城縣志

劉興義桐城人千總咸豐間在蠟磯禦賊陣亡

桐城縣志

李萬榮潛山諸生與張振之集團禦賊戰敗賊索張急萬榮出

稱振之是已賊支解之

潛山縣志

朱翠如潛山人咸豐間督練堵賊長嶺菴又練首余桂芳程嘉

穀程育良程周南俱在長嶺岡林普義等在長嶺之林灣余志

宏李焱南等在康陂山均各陣亡

潛山縣志

吳壽萱宿松庠生成豐間同監生吳方璧練首虞曉巖石開先

石待聘李燦文汪福林許春田余煥文均團練禦賊與團勇陳高順二百十三人及助戰民人羅福崇等六人均陣亡於同治

旌卹
宿松縣志

徐光裕宿松人縣丞咸豐年間禦賊殉難又九品周節從九品鄧元周任昌附貢羅兆熊文生方玉徐先矩許新嗜武生陳林蘇立功張應珠監生鄧安曉鄧邦相鄧朝旭周興徐士旂陳延璧潘士國均各殉難於同治年

旌卹
宿松縣志

宗秀琪宗騰靖宗騰館俱宿松人在營打仗陣亡又陳榮桂陳開先陳其國陳其家陳結義在籍助戰殺賊陣亡
宿松縣志
夏鳴鑾歐樹謀詹中太李殿元董發雲程樂松沈發言俱望江

人咸豐閒結團禦賊與章芹之等百八十八人先後陣亡均祀

昭忠祠

江寧縣志

胡立達宿松人提舉銜陝西知縣咸豐年閒同六品銜胡與淦五品銜徐倉石在甘肅陣亡又勇丁余安福張騰蛟王德福在陝西各營陣亡均於同治年奉

旌卹

宿松縣志

胡與祐宿松人從多隆阿援陝西保六品頂翎從九品同治元年髮逆陳得才等由河南竄陝渭南陷與祐死之

宿松縣志

方曜吉桐城人軍功五品同治元年從征髮賊在湖北孝感黃陂交界之木蘭山陣亡蒙

旌卹

桐城縣志

江鐸潛山人以直隸州從軍同治元年隨同克復甯國縣城加

知府銜受傷卒於軍甯國縣志

陳鷺峯潛山人藍翎千總同治元年從征潁州府力戰陣亡六年

賜卹世襲雲騎尉潛山縣志

胡宗誠桐城人六品軍功同治元年帶勇陣亡九年

旌卹桐城呈冊

葛啟玲懷甯人浙江歸安縣埭溪巡檢同治元年髮逆竄踞湖州啟玲在任死節是年髮捻合圍潁州六品翎頂外委譔煥文赴潁西偵探遇賊死程明珠禦賊於溪西范祿力戰於箸嶺六品軍功徐承先從征江甯均各陣亡懷甯縣志

龍森字書樓桐城人同治初任浙江龍游知縣率勇剿賊陣亡

世襲雲騎尉桐城縣志

葉淮字仲山桐城附監生四川鹽源縣丞軍功保知縣同治二年髮逆石達開由滇竄甯遣淮督兵河西齧血作詩誓死力戰陣亡

贈知府銜世襲雲騎尉其年石逆伏誅淮子春榮手割石逆之肉以祭

桐城縣志

鄧爾昌字仲韓桐城人湖南會同知縣軍功以直隸州用同治二年石逆餘黨竄會同城陷爾昌罵賊死

贈道銜世襲雲騎尉

桐城縣志

石承慶懷甯人都司同治二年在壽州禦苗逆陣亡又六品外委黃應期從征江陰之楊舍五品銜縣丞汪植崙從征江甯之三汊河營弁於啟順從征上海均剿髮賊陣亡植崙

旌卹如例是年浙江縣丞劉鸞鈞在湖州府城全家殉難

懷甯縣志

汪士林桐城人効力江蘇軍營同治二年溧陽守賊密約投誠
李鴻章命士林往招往返數次事垂成行過震澤遇賊被害祀

昭忠祠

桐城縣志

吳啟瑞齊紹先齊廣惠俱桐城人同治二年捻匪竄境均以被

脅不從遇害

桐城縣志

石兆雲桐城人從多隆阿剿賊立功累保千總同治二年在陝
西陣亡蒙

贈都司銜世襲雲騎尉是年外委孫福星從楚軍在陝西臨潼關剿回
匪陣亡蒙

旌卹又馬白字少眉在陝西剿回匪陣亡

桐城縣志

孫飛熊潛山人游擊從征陝西鳳隴陣亡世襲雲騎尉又六品
軍功王良貴從征陝西同州府陣亡於同治二年

賜卹又蕭可和蕭旺周凌普照倪紹祥張雲芳黃日元張永清汪官選

吳萬勝余邦哲江湘南陳義發均在陝西陣亡於同治二年

賜卹

潛山縣志

李德鍾太湖舉人陝西知縣升用直隸州知府同治二年運餉

至城固城陷殉難

賜卹如例

太湖縣志

曹連貴望江人藍翎把總同治二年從征陝西回匪陣亡世襲

雲騎尉

望江縣志

張徵庸字臣堯桐城人福建霞浦知縣同治三年檄辦平和團

練至南靖遇賊被害奉

旨優卹贈知府銜世襲雲騎尉

桐城縣志

張明達字文波桐城人福建縣丞署龍溪典史同治三年髮逆

竄龍溪城陷焚死桐城縣志

方昌烈字少仲桐城人累功保福建都司防堵海口遇賊力戰死事聞

賜卹桐城縣志

方顯庭字象卿桐城人福建縣丞保知縣在漳潮巡檢任捍禦海寇死

贈同知銜世襲雲騎尉桐城縣志

方寶峻字硯農桐城人福建從九品署邵武縣丞粵賊竄境城陷不屈死

贈知縣銜世襲雲騎尉又文生鮑承寬在福建南靖縣死髮賊之難陸

雲騎尉桐城縣志

邵維新字小魯懷甯人貴州平越知州集團攻克湄潭縣賊巢

解龍泉縣團保知府兼攝綏陽縣時逆匪吳元彪等攻綏陽維
新堅守八閱月糧盡援絕於同治三年二月城陷巷戰陣亡奉

旨從優議卹准建專祠

懷甯縣志

謝世選王家學潘繩武俱懷甯人同治三年從曾國荃克復金

陵陣亡

懷甯縣志

汪盛遇字傑才太湖歲貢初咸豐七年命子瓊瑤帶勇禦髮賊
衛鄉里同治三年盛遇年八十九矣親帶團勇擊擒匪於西北
鄉遇害八年

旌卹歲貢汪盛洽同時殉難

太湖縣志

程學啟字方忠桐城人初陷賊被脅爲僞官咸豐十一年曾國
藩圍安慶學啟自拔來歸積功補都司擢參將同治元年奉檄
從李鴻章赴上海擊賊漕河涇又擊之於虹橋下青浦解北新

涇及四江口圍連戰皆捷累擢總兵加提督銜授江西南贛鎮
總兵二年下太倉崑山新陽進兵蘇州學啟議先斷賊歸路後
絕其外援旋克花涇港轉戰同里復吳江震澤克太湖東西洞
庭奪寶帶五龍等橋隘分兵迎擊嘉湖賊之撲吳江者斬數千
級乘勝克蠡口黃埭許關虎邱各賊壘城賊窮蹙乞撫遂復蘇
州省城計殲諸僞王安反側第功爲最先後奉

旨記名提督

賞穿黃馬褂給雲騎尉世職進兵平望復浙嘉善三年攻浙嘉興以炸
礮摧其城率死士梯登及半中鎗子氣絕復蘇提督劉士奇等
乘勢猛攻遂克之學啟沈毅勇敢能謀能斷與士卒同甘苦所
向克捷爲近世名將創發卒於軍年三十五

贈太子太保銜諡忠烈史館立傳祀昭忠祠並於原籍及立功地方建

立專祠金陵克復加輕車都尉世職

桐城縣志

葉義桐懷甯人泗州營外委殺賊陣亡

喬松年奏案

徐開業潛山人千總同治四年在泗州剿賊陣亡

潛山縣志

錢桂仁桐城人游擊銜閩浙都司同治四年十月嘉應州剿匪

陣亡五年

卹銀四百兩世襲雲騎尉

左宗棠奏案

鄭德桂桐城人從九品客江西安仁縣幕佐辦防堵同治四年

霆勇過境譁變遇害

桐城縣志

馬克昌字由庚桐城人累保游擊同治四年在甘肅陣亡

桐城縣志

黃金山潛山人藍翎把總在河南畢營寨剿捻陣亡又外委歐

宏元在湖北廣濟守備曹連升在襄陽陣亡均於同治五年

賜卹

潛山縣志

朱良字少眉望江人陝西延長知縣升直隸州知州同治六年父憂畱陝帶勇捍禦回賊與子庸榛均陣亡奉

旨優卹贈知府銜世襲雲騎尉

望江縣志

張杰字漢卿潛山舉人陝西宜君知縣宜君舊無城杰建城募勇整飭守備回賊屢次撲城擊卻之同治六年城陷死之弟又被脅不屈亦遇害杰蒙

贈卹世襲雲騎尉

潛山縣志

王得華楊得順陳元勛俱潛山人從征擒匪在湖北陣亡於同治六年

賜卹

潛山縣志

白璧桐城人從潘鼎新剿擒匪積功保從九品同治六年在海州阿湖寨與賴逆接戰陣亡蒙

贈鹽知事銜世襲雲騎尉

桐城縣志

方有道字名山太湖人從軍浙閩積功至總兵加提督銜同治六年李鴻章調剿山東捻匪在魚台縣力戰傷亡親兵太湖人朱慶裕方重興同死之

太湖縣志

李年青宿松人從征湖北積功保千總同治六年在永瀝河陣亡

贈守禦所千總銜世襲雲騎尉

宿松縣志

鄧兆璫字葆初宿松人陝西延長縣典史同治七年回匪竄境兆璫同次子某督勇堵禦力戰均死之奉

旨旌卹

宿松縣志

楊秉琰懷甯人由通判從軍四川游保候選知府同治八年追剿猺夷在甯遠府西昌縣陣亡

贈太僕寺卿銜建立專祠世襲雲騎尉

懷甯縣志

查士瑗懷甯人候選巡檢同治八年在直隸祁州帶勇禦騎馬

賊陣亡

懷甯縣志

曹吉士黃玉桂黃廷經熊春發孫萬榮程其田黃廷謙俱潛山人在湖北剿捻陣亡均於同治八年

賜卹

潛山縣志

劉恆海劉恆升劉德修並懷甯童生禦賊殉難

奏案

陳澤源宿松人潛山營書識嘗隨知縣劉東書帶勇駐防太湖

後與兄大椿先後遇賊殉難

宿松縣志